



Editorial

Aw le, Pathian mapuina zal in “Damna Aw” March issue suad-awk thei ding ah ei puitu Pathian chu pak in um ta hen. Kum 2020 a ding in tu tha hi a tha thumna (third month) hi pan maleh KSP Financial year a ding in a tha lina ahi tai. Tu tiang dinmun in pawlpi taksa leh thagau ah I kalsuan dan uh a phato zel a, office lam ah sum leh pai lut dan le a lungawi um hi. Kum 2020 sung ah sep leh bawl ding khawmpi in budget ah a kawite le awl awl ah sep mualsua to zel ahi. Tukum hi taksa leh thagaulam ah I mawpuaknateu mualsua ah I masawn kum uh ahi theina ding in La phuaktu’n “Nangmau la mun mun ah” a ti gual in I umna mun chiat un sep leh bawl leh pauchapna theitawp sua in hapan chiat hi tiu.

Kochuam tin hi thubuai la buai um lo in taksa leh thagaulam in dam chiat hen la, vaihawmna leh ki-etkawlna (administration) dik hen la, kochuam ah meithai chaga ngaisak hi hen la, Pastorte, kochuam upate leh tual

upaten i mawpuaknateu pitin chiat ding in panthak la hitin, uh zia na chu sem ding in Lalpan ei guat ahi ti he in, mani lawkna ding, minphatna ding, lalna leh thuneina ding bep gel lo in “Khai le, simmaw ah I um taklona ding un kipan hi tin uh dinthak kit hi tiu” (Nehemia 2:17). Tulai materialism khawvel a hin miten hausakna, minthangna, nawpsakna, lalna, lopina leh kipakna bep a hawl tau a, ziate chu del in Pathian sang in a ngaina zaw tau a, maleh ziate chu Solomon gen gual in “bangma lo mai mai ahi” kumtuang dai ding a um pua, vangam ah puaklut thei lo ahia, a kipaknau a bukim thei pua, mu leh changten le a nei den diak puau. Amen.

KUM THAK AH LITHUK LAM IN LA LEN SEP IN.

~Evan. Pautinlam

“**A** thugen jaw phat in Simon lithuk lam in lalen sep in” Luke 5:4

Simon Peter in zan khuavak ah vel tamtak len asena mun bangma amatlona mun ah Jesun sepkit ding ah ahil hih, Peter a dinggin thatnawp umtalo maithei ding in gingchat aum hi, nguitak ah um bangma amatlona mun, gim ma ma tading, sanga pawt hunle hitalo jan ah chau sanga hung pawk sekna mun, adiakin len hi aseph thiamlo a dinggin, aleen in ipuanak kil (botton) akuai khak le eile eikai lut jiang theina mun himaleh Simon Peter chun Jesu thu awi in Geneseret lui lithuk lam in alen avak se chun sanga tamtak alen ek vang vang tiang in akhukhum in aman ta ti imu ahi.

Eimau le kum chiata hun chiasate ah inasep nau jat chuam chuam ah lawting tak ah umle um intin, khenkhat chu idawi gual takle ingaitua gual tak ah ilawtinlo maithei hi, nasepna ah chun nasatak ah panlan lasep nung ah le ladawi gual tak ah lawtinlo le ihithe. Sepna jat chuam chuam ineinau lak ah khawtang ahte ,suangkuan ahte, le gamthim (gamthak) iti diam Pathian na isep nau ah lithuk lam ti pansan in vak tak lang hiti

1. Khawtang ah:

Khawtang tihi nisin ikhawsak dan, itawidan, ikampau dan, midangte imudan, eiman midangte imu dan, igeldan, eiman igeldan, tilam pang in gen hitin. Jesu matsak ah aumlai tak ah chun Peter in Zan in Thiampu lian kiang tiang aju ah. Nangle Jesu nungjuite lakah khat la hi atilai un aman ka hi puai timaleh

midangten a kampau, a tawidan leh akichei dan ahte ahetho tho uh hilo maw “Luke 22:55-58”. Zia gual ah chun eile khawtang hindan ti ah hin khenkhat chu lawtin mama ah kilang alunggil lam ah lawsam, khenkhat chu apawlam ah lawsam gual ah kilang himaleh alunggil lam ah kipak mama aum thei ahi. Kati-na chu Pathain in eisiam ua i mih-

ing hinau akibang pua khenkhat chu hausa deu leh chaga deu khenkhat lekhatiam le thiamlo, Namdang pao thiam leh thiamlo, akhawhe deu leh akhaw he deulo, Akamtam deu leh akamtawm deu tite khawtang hindan tihi gending atam mama chung in igen nawp chu athuk jaw ngaitua ding a kagel chu lungthim ngaitua theina Pathian in eipiau ah, Apha leh phalo, ahawi leh hawilo, Akilawm leh akilawmlo, anuam leh nuamlo, athiam leh thiamlo, ahi leh hilo, adik leh diklo, amel pha leh phalo. Sawlchak pawl in Dan neiloten le Dan aneilou vang un alunggil sung ua Pathian piak apha leh phalo hitatheina apia, (Rome 2:14-15) ati gual in ziagual neitheilo chu mingol hopi theilo ititeu hi ahisek hi. Khenkhat vang chu ahina gual tak ah khawtang hintheilo le umtho nantin. Ahin tuni hin nang leh ken midang chungah ithil bawl dante min ei chung a eibawl dante, en midang imu dan, imu tawm dan te, midang in eimu tawm dante ahem ngaitua in lunggil lam thukdeu ngaitua thak in Bible in mijosia tawh ki-

cham in um un ati gual in chamna Lal chapa Jesu pian i lawp jaw nung un ngaitua thak in mi josia hi Pathian in asiam ah ahepi ahi tihi kumthak tawh kitawn in hiat apawi maw ahi.

2. Sungkuan lithuk lam tihi hiti hin vak en khawm hitu leh.

Sungkuan tihi apawimaw mama ah, lekhabu zik tamtak inle sungkuan ti thupi mangin ala zik sek uh ahi. Nu leh Pa tamtak chate sua na zia kah lungngai lgam leh Kochuam sungah i um gam tau a, khenkhat chu numei ahem Pawsal ahem gitlo zia kah lungngai ah aum thei. Khenkhat chu sum leh pai haksat zia kah, ahiloleh nat leh sat vangsiatna jat chuam chuam in adel khum lungngai takah um, Pauchapna leh nasepna nasatak ah pan la, apan nunga le lawsam leh beidawng takah hinkhua mang pawl, ahin khenkhat sungkuan chu kuaman hiatphak ah le neilo maleh lim takah Pathian kiangbul ah Insung maicham siamjing le kium maw puana a, zia haw kal ah hin, khenkhat pawlam ah midangte ma ang ah Insung khaw sakdan gen ah maicham siam

ah hapan mama a tawp lamah ama Insung lam etkawl ngaita, midang cha leh nau leh ama cha leh naute khawsak dan hung kibat tak lo ziakah lungmuang zo talo a um, khenkhat vangin Pathian thu ka genna ziakah ka Insung ka khawksak lo, ka Insung satan gam asuakzo ta ti ah Pathian thu genah kitang kopite a ding ah lungkiakna thei tamtak aum chang aum sek hi. khenkhat chu Pathian nasemte insung ettawn thei ahipuai tichang le aum tho hi. Ahinai khenkhat chu anu apa bangma min amulote chule a chate Officer liantak tak suak le aum tho hi. Zia haw chu kipakpi umtak ahi. Khenkhat apa ahem chu Pathian ah kipe mama a chate mattheilo le aum kit hi. Ahi ngeinai, Insung khel khawksak ding chu a umpuai, mizosian a insung leh a chanau akhawsak chiat hi. Ahin, a kua zosia a ding ah pawimaw ka sak thukjaw diak ah kagel chu, Officer leh mi nautang Kochuam sungah puitu deu le, Kochuam sungah Hotute leh hotulote a dingin, midangte kiang ah Pathian thu i gen gual ah hin Insung in i gen sek nau

em, ahiloleh Insung ah thilpha i hiatteu hi midang kiangin i gen sek nau em. Kei gel dan in vang midangte kiang ah Pathian thu ikitang kopite hi insung ah atamjawn kigen khel dingin ka ging cha puai. A ziak chu i cha leh nau i hilnateu leh insung ah ikithu hilnateu hi midang tawh kitena ahem, ahiloleh i chate a ding chanchin pha achuam, midangte ading ah a chuam akigen dia aw tin kagel hi. Sungkuan nawpna dingin chanchin pha dang a umpua, Joshua'n "Kei leh ka inkuan ten" ati hi, a inkuan ua agen nung ah a gen hiding in kaging chai. Kumthak tawh kituak in Jesu lithuk lam ati gual in, Jesu thu mangin Insung ah athuk jaw diak in ngaituan pan lathak hitiu.

3. Gamthim (Gamthak) nasem masapen chu Jesu ahi.

Tuhin Kochuam te angansia tai. Kochuam hi Society kipun khawmna mindang Ineiteu gual ahipuai, Khrista thisan ah ko daw, kipun khawmte chu Kochuam ahi. Ale I Kochuam teu hin Khrista ah mi ahipnam ahiloleh thim ah umte a salvak seknam, mi thatnawp theina maimai ahem, ngainawp

umlam jawk hawlin iki punkhawm mai ihi tau em, tulai Kochuam khenkhat mi hip talo le um maw puana e, thagau lamah mi hip talo a, ahau avai leh migentheite mutawmna mun, abawlthei theite kietna mun, a genthei deute thu kilakna munle ummaw puana, ahin, Khristan Kochuam ahungsi-am nasan penchu Pathian thagau thiangotho matchakte thu neina ding mun ahi. Kochuam sunga thagau mi taktak i um tau a, kipak thu genkawm in jia haw jal ah hin gamthim nasepna ahat a, mithak kimu sek eive. Ziachu gamthak tina ahi. Thagau mangthai veikei lo ah Pathian nasem kuanthei ahi. Keile ka ngaitua le ka lawtinna sangin ka lawsapna atam-jawk mama jiaakin jia hi kajik ahi. Ale mikhat chu Mission Field in akuanta a lawsam ta, jiachu kua jiaak a diam le? A mawpawtu chu a kuanpa Pathian in a matchaklo jiaak le hintin, kei ngaidan in akuante leh a sawlte kibang in kagel hi. Tekhin nan, tulai Khawvel a khanto tawh kitawn in Kochuam kikhawpnate hile a sungah mite hiatthei dingchau in Sound System akimangta, tu masang lai

ah chun Biakin chuam chuam ah kikhawm in pawlam te hiatding dawina jiaakin, Mike (loudspeaker) aki ngatsak tua a, a gi ngai-loten thuakla mama jiang gualah hilo dingin, bang ahem i sep hih? Kochuam sungah hinna mutate kianglam ahem ingat, ahiloleh, min gingtu asiamsate khah iva hawlkit ahem, i veinat hi thagau mangthai thimah umchu ahitak tak nam, jiaho i gen jiaaka hin Kochuam a gingtute kiang ah genlo ding katina ahipua, thagau an inle kivak tua hitiu.

Mak kasak chuh Jesun Simon Peter kiang ah la len sep in atia, tamtak amat nungah Sanga ala mankit in ati lo hih ahi. Ei kiji le tukhel hungman jingin la keile eihun pian kiti maithei ahi. Luke5:10. Tukhel mihing mantan la ati hi ahi. a chuti le sanga sanga thupi jawle piljaw mihing hi Pathian in lithuk lam ati hilo di ahem kati e.

Mimat tihi Police te tilo midang miman imu le kiman in kivua kithat ding ahi. Police ten mi ahawl tak ua leh migilo te ahawl ua, Jail (Suangkul) ah akhumsek ahijjak un mi ajamsek ua Police

ten amatkhak ding uh ahijak un akisel sek uh ahi. Aleh Chanchinpha vagen na ahin le nang mipha la hi vati hi lah i Bible in aphal kit tapua Rome 3:23, mizosia migilo atikit ngala, ale bangtin ibawltadiam ule! Tukum ka kipakna mama leh ka lungdawn kitna chuh, Kochuam tinin gamthim a dingah mitthi tui tawh Pauchapna tawh Paisa ise khawmteu Office lamten kipak man ti ah thalaw (Salary) eihun piak ban un, 2019 Christmas leh 2020 New-Year a dingin Paisa ei hun piau a, buting set in akimang valset nalai ah, kipak takah akium jinglai in, Paisa val ngal ah mithak apunbe theilo hi kangaitua in, ngaituana thak khat eipiak in kahia ka hung taklang ahi. A paisa leh a thilpiak apawimaw puai katina ahipua, jia haw bei ah chun Pathian na akisem theipua, ahung pete josia chungin kipak thu gen kawmin Pathian in pethei jel dingin le hun malzawl zel henla. Ahin ka gen nawpchu lithuk lem tipa hih kua ahem ti gennawp najiak in kagen ahi.

Awle tuhin suapi u leh nau Khrista thisan jalah ka Insung

mite haw, mi hausa tak le la hi maithei, mi chaga takle la hi maithei, ahiloleh mipil thil bawlthei takle lahi maithei ea, thildang bawldan thiamle lahi maithei, nekguk chakguk le lathiam maithei hi. Khrista a dingin mihing laman khatam? Gamthim chu Gamthak ah lasiam theitam? Ale thunei naleh pachak, minthang dawina jia kin lapang sekem? Chute ahi lehvang lalungthim gukah kipak na taktak chu neipuanla. Nepolean chun mizosia hi a pawlam in kajolo kuama a umpua hen, ahinlah mihing lungthim vang kuama kajo puai atia. Nazareth Jesun vang apawlam in kuama jolo gualin kilang maleh, mizosia lungthim ajosuak vek ahi ati hi. La phuaktu khatchun Aw Lal Jesu apanlo chun Khawvel pumhi bangma lo mai ahi ati gualin, tu Kumthak tawh kitawn in Jesun lithuk lam in lalen sepin ati gualin ilawsap nau hitaleh i beidawn nau hitaleh pan lathak kitin i sepna mamau semkit dingin Pathian kiangin dawnthak kit hitiu le. Amen.

Role of Youth in the Church/Society.

“La khangdawng hi’na kuama’n hun musit ki’hen; himaleh, pau dan leh tawidan, hepina, ginna leh thianthionate ah chun gingtute et-tawn dingin um zaw ta’n.” ~ I Timothy 4:12

by Rev. Seilunlal Vaiphei

Introduction: Khangdawng/Khanglaite hi tuni hun ahin, Kochuam leh Khawtang in ama maw leh apawi maw pen te laka pakhat ahi. Hiatna leh thiam zilna lam in le thil hiatthei hun leh mite ettawntak hun chu ahi. Khangdawng hun hi pakcha gual ah tekkin ahi bakin thil bangkim lam ah achiasau dingte leh ahawi diak leh apha diak ding mu chian tu leh hiachiantute chu ahiau. Siatna lam ale siat bawl nawpna lungthim puzing tu te le aki hi kit bawk hi. Ziaziaka chun khangdawngte hin Kochuam leh khawtang ahin maw puakna lianpi anei ui. Anuai ahin khangdawng/khanglaite mawpuakna tamlocha vak en khawm hitiu.

Who is a youth in the Church:

Khangdawng kiti hi naupang apat piting hung hitate genna ahung hi deu hi. Sia leh pha hung khen dan thei ta leh kochuam dan hun zo ta te hi khangdawng kiti ahi. Akum zat bituk mawng a um diak lo ahi.

The role of youths in the Ministry: Kochuam kiti hi mi genthei, hausa, apil leh pillo ki lawi khawm a Pathian nasep na ding ah dindaw ahi. Khawtang leh Kochuam nasepna ding ahin khanglaite hin pan nasa tak alak uh angai hi.

Chuleh, khawtang ah ahung ki-matchak phat uauleh khanglaite ading in Christian khawtang hindan hiat abailam hi.

The youth in the family community:

Pathian in khawvel ah mihing hi inkuan hi ding in asam ah, zia inkuan te kipat chun khawtang hung ki siam dawkit ahi. Khanglai te hi i inkuan a ding ah taksa leh thagau ah ettawn i hiban un naupang te ding ale kawkm tu pawimaw tak i hiu. Nu leh pa tawh ki thua in ginna

lam ah leh Pathian ngaisak na lam ahin insung ah pan nasatak lak a ngai hi. Ei ma insung bep hilo in khanglaite hin mi dangte kiang leh khawtang in le Pathian hepi na leh gingu hi na tangko pi a pawimaw ahi.

The youth in the Church Community:

Kochuam ah hin khanglaite hin mi piting te tawh ki bang a mawpuakna i nei ui. A ziak chu gingu zosia hi Pathian pak ding leh a chanchin puangzak ding ah ko i hi ngal un. Tulai hun ahin khangdawng te hin kochuam ah ginna lam leh sakhua lam a tangpi a hiat uh a pawimaw dung zui in a hung zil tou zel ua zia a hiat nau chu kochuam nu leh pa ten ngai nep piak ding a hi puai, a ziak chu Pathian in mi zosia hi a ko a hi ngal ah. Khanglaite hin Biakin a sep leh bawl leh ki vaihawmna hin le pan a lak uh a pawimaw bawh ahi. Zia gual ma chun kochuam ten le khanglaite hi sum leh pai leh pan mun zat chuam chuam a piak uh a pawimaw ahi. Khanglaite'n a tha leh zun teu kochuam a ding ah a piak gual un kochuam ten le

kochuam khanto na ding in khanglaite hi thunei na a piak uh le a pawimaw ahi.

The youth in organizational Community:

School, kochuam leh inkuan tilo in le khanglaite'n pan lak thei na tampi I nei ui. Kochuamte hin khanglaite mangchan pawlpi khat siam ah zia chun khawsung masawn na ding leh khanto na ding a sem ding in panlak thei ahi. Etsak na khawsung khat ah lekha simtheilo chu zia pawlpi mangcha chun lekhasim dan va hil leu hin zia nu a hem pa a hem chun lekha a hung simthei phat leh Bible hung simthei in tin Pathian nasep nalam ah le phatchuam na khat hung hi ding ahi. Zia ban ah chun khamthei sal a tangte soal na zatchuam chuam nei te haw leh holim pi ah lampi dik khawkm tu in I pangthei uh ahi. Tichun khanglaite'n pan la ta leu hin i khawtang leh Christian khawtang nuam tak hung hi thei ding ahi.

Spiritual and personal growth of the youths:

Gingu masate'n hiatna/thiamna ala nei teu sangin tuhun

ah khangthakte hiatna/thiamna sang zaw anei ui. Ziaziaka chun, khangthakte'n a khangthak chan-pi dangteu thaksa leh thagau ah kaihui thei ding khawp in pan nasatak alak uh apawi maw hi. Bible achun, Pathianin khangthakte hi ala mangcha sek hi. Christian khangdawnge chu khawvel nawpna apat ki kawu kangin, Pathian thu hiatna lam ah hung piting in hinkhua a haksatna neite Pathian thu tawh kituaka ziltit thei ding khawp in um apawi maw. Etsakan, Mary in nausen Jesu alawap lai khan ama le khangdawnge ala hi. Chun, Pathian in David leh Samuel anasem dinga ako lai akhan khangdawnge cha alahi nalai ui. Tu hun ahinle Pathian in khangdawnge mangchan na asem zing nalai hi.

Khangdawnge hin Pathian na nasatakah i sep thei nading un khawvel thilte tawh kikiwi kang a ihun tamzaw Pathian lunglam hawlma mat ding ahi. Khangdawnge hi tunung ah Kochuam puitu/loi upa hung hi ding ahi zikun Kochuam ah nasa taka kimangchan ngaidan lui leh vaihawmna diklo te sang-

danglam ah mipite thamuang taka akhawsak/um thei na dingun. Mipi lungthim ngui leh chau a umta te, sukhak kit na dinga khangthakte'n lungthim thak nei a pan lak angai hi.

Youth is God's gift to the Church and society today:

Khawngdawnge hi kochuam leh khawtang adinga malam kinapna mai hilo in, Pathian apat malsawmna ahui. Zia I malsawm na dawnteu hi amat dan I thiam uhle phachuam tak hintin, I mat khial khak uh ahileh ikochuam leh khawtang adinga malam(future) ki suksiat suak ding ihui.

Thu khakna:

Kochuam a dingin khangdawnge hi kipia dawka alian aneu pangkhawm a na sepkhawm hi apawi maw tak zet hi. Khanglai tamtak te hin I maw puak nateu hemil in, Pathian dawisak nalam hilo in mihing dawitel nalam in ila chia zaw sek uh ahi. Himaleh, Pathian in ama dawilo lam isep/ibawl lai un le ei nusia lo in, hepinan ei ko zing nalai ui. Khangthak te hi Pathian inle adawi a, zia gual ma chun setan inle amang cha nuam kit

zel hi. Pathian gam leh setan gam
kek let zel na dingin khangthakte
hin mawpuakna lianpi inei ui.

Khangthakte hi tunung a
Kochuam/khawtang puitu dingte
ihi ziakun I Thagau din mun uh tu

akipat hin kisuktup a taksa leh
thagau ah tu din munsanga hawi
zaw leh pha zaw ah pui huai thei
ding in pan ilak ding uh ahi.

--o0o--

THUTAK LE BUL CHU.....ZUAU!

- Nisin in Bible sim in la pauchap zing maleh gitlou thuk pen ah sal zing lahi
- Kikhawpna la thul khapuai, maleh sunglam in hawmna (emptiness) nasa tak la nei zing in thamuan na diktak la nei diak puai
- Thagau tangsang le munang tak ah ding gual in la ki ngai maithei maleh thina luiguam pal zing, thagau ah dapsa kithing zing lahi ngal ah
- Lalgam ngaina ti in an la ngawl, la pauchpa zing sek, ahinla thagau ah pat panpi le hatna la nei thei diak puai
- Kiangkhau in Lalpa kiangin la dawn ngut² sek. nangma dawigual chau la gen genchai ah Lalpa thugen ngai man puan, la he nuam puai
- Kochuam/Biak In la kai zing sek maleh koute lak in lapang kha ta puai
- Thagau apat hetsakna nei in la ki gen ah maleh la khawhei in Lalpa zangaina le hawina alang zo puai
- Thagau mangthai tamtak tandawkle hukdawk in la ki ngai maithei, ahinla Van Gam ah la mun ding akiting tapuai.
- Thitha, thagau buak, damlou, le natna te la sudam sek maleh Van gam ah la mun ding luah dim ahi tai.
- Bible a bung le chang mulou in la gen kim thei, la hesuak hi maleh

Van Gam kawt khak ngak ten ahun he ta puau

- Camp/halthakna (revival) la chang hi maleh nutsia te lak ah la pang kha tho thou nalai ei
- Pathian sathau nusa kahi la kitii maleh laktou ni in hetmil khak te lak in la pang kha tai aziak chu la luchang kha mihing nuh sa Tui mai ala hii
- Lalpa kakipak hi lei malzawl-na zozai te tizing pum in Mi zi le pawsal te tatsual pi ding in la en zing,
- Lalpa kakipak hi lei malzawl-na zozai te tizing pum in nekguk chakguk laki sum diak puai
- Lalpa kakipak hi lei malzawl-na ziakin tizing pum in la insak, inveng te la itthik zing nalai hi
- Lei gou mangthei haw sangin kumtuang gam buai pi ding ahi la ti'n, sum le pai hawl lah la hai diak puan, inmun le lou mun chawk le lahai diak puai kha
- La thugen te mi hawisak lou khak ding la kiveng taluah, thagau in ahung pawl thei puai
- Vaihawm thiam, mapui thiam hi la buai pi takluat nalam in

la thagau a basap khawlaw in, la insung in gepchauna (hawm, keu, kinawk, basapna) anei khawlaw tai

- Vak et ah pawlam ah pak sawt² hiding labuaipi takluat ziakin, la sunglam amuat takha. La kianga umten namsia asau.
- Mi zosia hi nang sanga thiam-lou zaw, helou zaw, bawlthei-lou zaw ah la mu le gel zing sek ziakin la beng ngawngta (deaf), mitthum ta (Blind), vai-cha tak in la vak vel² tamai hi
- Thagau in apiak hilou nangma le la insung chanchin hawina le phatna la ha gen takluat ziakin thagau mangthai aki pun belap khawlaw sek.
- La zi, pawsal, chate phatna le bukim na tilou ngal gen ding dang lahe puai, la Belam te lak ah la ki bual lou zia ahi. Amau in le ahun hemil gam tau.
- Belampu diktak kahi la kiti ngal in, la gancha ten ahung lau tau ah, ahung muang talou uh ahi
- Nik le puan pha tak² sil in Biak Inlam la zuan ah, Pathan thu kigen ngaitalou in ngawn na zen in la khawdak in, la va

ipmu ta ahi

- Nangchau Pathian thagau changthei le mu laki sak zing ziakin, mipi te la umlou nalam lam ah um nuam asa zawtau ei
- Holim na zosia ah ahepen, ngaidan hoipen nei lakisak zing sek ziakin, la gual ngaiten awl awl in ahung kihap mangsan pan tau
- Nangma hun pakcha le hun zabawl te chau kianga um la nawpsak takluat ziakin, la gaal, gilo lati te hawn Lalpa pakin laitual ahun leng khawpsan tau
- Mipi pahchatna le minthanna la ha del taluah, la in zawtna la hemil ta ahi.
- Vak chate ihu la ti'n maleh thim nuai lengpa kianga um nawp lasa zaw kit ngal in..
- Form zat chuam chuam la fill up phat le Religion mun ah Christian kin tak in la zik in, Christian umzia bawn he chian lou
- I taksau hi Pathian munthiangthou (Temple) ahi maleh asung ah um haw la Diabol le a thuaihuai te hi kit jel
- Zi/Pawsal nei nailou, nupan ki-

kal thu he kisa mama le nupan kikal chamna thugen thanuam le thiam kisa mama jel

- Mi nei zosia eng, mi nek zosia ducha, mi gen zosia ahetsa vek, mi holim na zosia ah ahepen ah pang gawtei, zuau thu tut tuah ah pang in lawting le sem pha kisa ma ma sek
- Mun thip pen ah la thil hi chu mipi lak ah puanzak ahitai
- Mi tamzawn pha asanau ti ah thudik thiamlou chansak khawk lasa puai

Zia khawvel lampi hi khatvei bep haw dingah siam lahi, la nunga ahung zui te ah ding lampi siamtup malam piak tu hi guan.

Khuti le Lalpa ang ah kam khat bek gen ding la nei thei khak le.

Ziktu : Kaplianlal Thangluai

(Ka khawvel hinkhua mudan le tuakkhak tea pat ahi, kuama kawkuam anei puai.)

--o0o--

Pathian kiangah thilpiak

By Upa L.T.Khupa, Tuibuang

Jesu khrista tawh kross a ki kaimat det gual in, khristian inkuan ti leh Pathian kiangah thilpiak ti hih a kimat det ah. Pathian in a chapa neisun ei piak ziak a kumtuang hinna neithe ihiu a, i taksa'u leh bangkim mai hi a lopina ding ah piak thuk kit hih i bat uh ahi.

Khristian sungkuan hive ngal a, Pathian kiangah thilpiak pe ngailo sungkuan chu, amu ding uh mukhial nalai ahi nuam ui.

Bang ziak a pe ding ihiu em?

Pathian hepina chu a chapa ei piak ahin a kilang chian, zia gual ma chun Pathian i hepi'u ti a kilat na ding chu, i thilpiak uhin a sulang ahi, chuleh van ah go kholkhawm dingah Jesu'n ei vaithak sep butinna le ahi. Mihingte sialkawp(angka) a chun piakdaw hih hekna(manna) ahia, Pathian sialkawp(angka) ah chun piakdaw chuh punbe na ahi zaw'i, petute kiangah piak kit ahi ding thu Lal Jesu'n kichian tak ah ei hil ziaakah i piak di'u ahi. Piau in, tichun nang ule piak in um inla'u, phatchuam ngai tak ah te piakin, a sawt ah sawtchak in, alaw-alaw chak in, adim let hial in la angsung ua sun piak in um ding la hiu, mi la tepiak nau ngai ma achun nangma'u le tepiak a

um ding la hiu atia(Lk.6:38).

Sawmakhat piak

I laklut zosia'u a kipat sawmakhat piak hih Pathian i bat uh ahi. Gam sungah sawmakhat zosia, lou ah thaiga hi henla, thing ah gate hitaleh a leng in lalpa chantum ahi. Lalpa a dingah thil zek thiango ahi(Lev.27:30). Adam chate Kaina leh Abelte apat ah khan Pathian kiangah thilpiak hih ala kipan ahi tai ti imu thei uh ahi. Chuleh, Abel inle a belamte lak ah piang masapen asa lakah a phatna penpen chu ahun lan a(Gen.4:4). Abraham khan le Pathian chungnungpen thiampu Melkisedek kiangin sawmakhat apia ahi (Gen.14:20). Lal Solomon khan go thil leh ga masa

zosia ah Lalpa chawihawi ding
ihi dan uh ala gen hi(Thupil.3:9).

Sawmakhat piak dan

Kumsin in la louma'u
ah piang ta phawt chu diktak
i sawmakhat la kawu chuam
ding uh ahi(Deut.14:22, 23,28).
Sawma pakhat hi chuh mimal le
sungkuan in kul leh pawimaw itina
lam lam ua kaikawi ziang ding
ahi puai, semtu chawmna ding
ate, Bible Society a te, genthei
panpinate, khawitak centre leh
Home ahem ah ala mat ziang chi
ahi puai. Zia haw a dingah chun
sawma pakhat bangkhai sawma
pakua lam apat piak ziang ding
hi zawna.

I Pathian ngei in ka in
ah nek ding a um theina dingin
sawmakhat diktak in ka in ah
hun chawikhawm un(Mal.3:10)
ati chak ziakin sawmakhat hi chu
kochuam ah i pelut ngeingei ding
ahi. I piak(envelope) dakbawm
a i fillup dan ahin Pathian gam
ti ahin piak tampen ding ahi,
aban in tualsung ahi ding ahi.
Sawma pakhat piak ding a chun
i paisa nei a kipat, athak thak i
piak ding uh a pawimaw mama'i.
Israel chate kithawina ding haw

khan le a dawu tui sek ahi kha.

Thingtang pa nam
nunchan leh thilpiak hih ala
kilaiguizawp hawi sek mama ah.
Ipi leh puteu in hawm dial dial
nek dial dial ti in ala gen sek ua,
zia thu hin ei thingtangpa nunchan
a taklang hoi mama'i. Sungkuan
tin te tawh a kikawmtua vek ua,
a nun bep uh hilo in anei zosia'u
tawh a kizawp mat vek ahi. Nek
ding aki piau a, nei leh lam, gam
leh gua, sum leh pai kikhawm in
a kipetua'u a, nasep lam inle a
kipanpi tua'u a, In leh lo chan inle
a kitundin pi dial dial sek uh ahi.

Gingtu masate khan le
kochuam chia theng in thil a piau
a, genthei a panpi'u a. Zia a
bawl zosia'u khah i Lalpa'u Jesu'n
ahia "Ka damlo lai in lei kantha'u
a....zia ka unau lak ah neupen
chungah la bawl uhi ka chungah
bawl la hui kha" (mat.24:36,40)
ziaachun i thilpiak uhi van ah go
lultak i khawlkhawm nau ahi ti hi
ginla chi hi puanna.

Thilpiak hih Pathian tawh
i ki laigui zawpna ahi. Mihing
ki laigui zawpna hih i thilnei
kipiaktua hin a sulang chian pen
sek hi. Mi'n paukam in ei hepi

mama henla, a thilneite itcha leh ama chuh i ngaina taktak thei puai. Le lampang in mi'n a paukam in ei ho lawmlawm lo lele, a thilnei dandan ei a dingah a itchaklo chun ama kha i ngaina'u in ei hepitu taktak hin i gen ziang sek uh ahi. I Pathian unle mihingte ahun zawpna chuh, a chapa ei piakna hin ahi. Ei unle ama i zawpna chuh thilpiak bawk in ahi ngei ding ahi.

Paukam bep in vang Pathian hepi a bailam mama'i, Pathian in ei hepi dan tele mitthi tui pawt(luang) jutjut ah gen a nawp ah, bai le a bailam hi. Zia gual zinglai in ama a dingah thilpiak ding i itchak tho uh chun ama tawh i ki zawpna'u chu a chian chuamlo ahi. I Bible ua mi hausa khanle naupang neucha ahi lai a kipat in Pathian thu chu a jawm seka. Maleh anei kiam kiam ding ahi phet in Lal Jesu chuh nung-ngat in a tukkhuk le ngat in achia san ziang ahi khah, sum haute a ding chun Pathian gam alut a haksa na e ti in i Lalpa'u Jesu chun mi hausa thu khah agen jawm hi ti i hiau(Lk.18:27). Ziakachun sungkuan tin te hih ki

enchian hitiu. Thilpiak lak laka tena niampen sawma pakhat beple pe phallo, puitute, sawma pakhat itcha thagau mite, thagau thilpiak dawng hi ngal Pathian in pe ding ah a phut pe phal zianglo te kochuam tin ahin um maithei ihu. Thil zosia kei a cheng cheng te chu nang a ahia, nang a chu kei a ahi ti thei sungkuan hi chiat ding tup hitiu (Jn.17:10).

Mi hausa sumchip tak chu a sum suak in a pang ah(a umna) a zawlo ding puakjik a siampiak sek a, mi hausa thilphal tak chun a sum suak in a siam ah aliangko suzangtu dingin amang sek hi.

Tichun mi hausapa khan a sum kha Pathian a ding ah matdaw gawlo in, ama a dingin a buaipi mama a "Mingawlp tuzan ahin la hinna la ding ah, la thil guanggalte chuh kua a ding ahi ta diam?" ti aw-git ahe ta mai ahi kha(Lk.12:16-21). Zia chuh; Lal Jesu'n a gen zawma "Mani a dinga sum khawl ah Pathian lam ah hausa lo chuh zia gual chuh hi ding ah" atia.

Khawvelangka(sialkawp) a chun hawmzak hi punna ahithe mawngmawng puai,

hekna(manna) bep ahi. Zia thilpiak lawkna thuguk chuh khawvel mite hiatthei ahi puai, a petu bep in ahe bep sek uh ahi. Tangval pakhat hin lekhathawt amu ngai mawng mawng pua. A ziak ahe daw k ta, aman kuama lekha a thawkkhaklo(ngailo) zia kin dawnhuna ala mulo mai ahi. Zia guala chun thilpiak pe ngailo chu ahaus a thei pua, thagau lam nunthak le a dawnglo bik sek ahi. I biak Pathian hih thil phaltak(huangphal) tak ahia, a chapa neisun le itlo a ei petu ahia, zia ziak chun ama betute chuh a thil phal di'u ahi. Sawma pakhat bep le ama a ding ah itcha tu chuh thilpiak ah a pianthak angai ahi. Thilphal kithawina chung ah Pathian lung a awi mama ahi(Heb.13:16). I piak ngamna chan zela thilpiak limna(kipakna) hih mu zel ding ihi ngal un, ziakachun pun(law k) i nawp chun piak masak ding ahi. Pe phawt mai le chun nei tam inla.

Mi tamtak in Pathian malsawmna tamtak a dawng ua, malsawmtu a dinga piak kit gawlo in a chip(sumchip) pi'u a,

a chanu leh a chapa teu ngeile ne zotu hik lian ding in Lalpa'n a amanga, i sepdaw sa leh eima thiam tiang tiang ah ala kikhawt hamham teu le ahun chen buai vek sek ui. A dawn(mu) dungzui a min a piak kitlo uh chun nupa kal ah limlonate, sungkuan hisellonate, eima sepna lam chiat a lamzanlonate anei ut khawp mai ahi. Malzawl na lam sang ah apetu lam zel i ngai pawimaw a kul ta ahi.

Abraham khan a chapa nei sun a et chin ngailo kha Moria tang pakhat ah lan dingin a chiapi nak nak mai a. Thilpiak lampi hih asuk ato mama mai a, thawknate, channate itchaknate pal then angai sek ahi.

I Lal Jesu khanle ei uh a dingah a hinna alat ding a khan "Hepa a thei ham chun zia no hin ei pel ham hen" ati vawngvawng mai ahi kha. Ziakachun ei unle itcha mama le hin le, da mama pum ah i piak dung uh hina. Bu itu phat lele da mama pum ah itu leh thanuam(hat taka) itu khah akedaw dan a kibang tho ahi. Piak ding i itchak natak khah sual nasep ahia themtu'n ei buanna

ahi. I piak ziang phat leh themtu khah a guallel sek a i zo tau tina ahi. Tichun a dawngtu Pathian inle itcha taka i phalna(piakna) kha kipak mama ding ahi. Abraham inle itcha tak ah a chapa a piak nung akhan Pathian in "La chapa neisun le la itchaklo ziakin, Pathian la kichai ti kahe tai" ati ahi kha(Gen.22:12).

Mi khenkhat ten Pathian kiangah thilpiak i phallo ziak uh chu, a chiana ding ngaitua in i buai sek uh hin a kilang. Nidanglai ah Jacob chu a chapa duatpen Benzamin, Aigupta Leng in a vaithak ziakin a buai mama mai a. "Boipu hi a chia zel le vang ka lu kang hih than ah ka liampi ding ahi" ti in a kingai khu ziang a. A chapa chia na ding chu a chapa ngai mama Joseph kiang ahi ti he vang le chuh kipak ziakin a biang ah mittui(mitthi) luang zaw ding ahia, maleh ahe paw ngala. Zia gual ahin ei uh le i thilpiak chia na ding i hiatchianlo ziakun i buai thei sek uh ahi.

I thilpiak uhi Pathian kiang a tung ngei hi ti hih i hechian ding uh ahi. Mi thilphal tak Kornelia khan kochuamte kiangin thilpiak

tamtak ape sek a. A thilpiak khah Pathian chun a dawng ngei a, apetu le ahia, "Kornelia la pauchapna leh la thilpiak thute kha hiatzing dingin Pathian kiang a tung to ta ahi" ti in vansawlchak in ahil ahi(Nas.10:4).

aban sutzawp ding..

VAITHUM BANGZAT LANEI AWM??

--Marka.6:38

-- Rev. N.Dalla Vaiphei

Chanchinpha buli ten kichian takah ala taklat uh Khawvel khangthu ah thil lamdang avel ah tung kit talo ding Jesu thil mak bawl lopi tak mai, vaithum panga leh sanga pani bep ah mipi sangnga avak vana thu hi la ngaitua kha ngai em?

Ziagual thilmak lopi kha tuhun ahin tung taleh, news paper leh TV chuleh tulai ah WhatsApp haw hin ki thedal intin, a ennuam ah chia chu mipi phutbut senle hi puana. Ngaitua tia ziagual ah thilmak lopi bawl tu kha kuama dang ei paw ve..nang leh kei tan dingah khawvel ah hung piang hukdampa Lal Jesu ala hi. Alopi na lawm lawm e..Halleluiah..

Sakhua dang te pathian in ziagual thil mak lopi abawl uh i hekhau em? A um khalo ahi. Ziani ahin anungzuite kha banggual in aki aan ta diu em..?(zia hi ka ngaitua phat leh Khristian khat kahi hi thupi kaki sasek chu lam e..) Sakhua dang te pathian sangin ei uh Pathian hi a chunngung diak ahi, tih ei ngaitua daw sak sek ahi.

Mipi tamtak Lal Jesu thugen ngai nuam ah hungkhawm te chu

Lal Jesu chun amu in alungsiat ma ma a, chingding neilo belum hawn gualin a mu ahi. A chang leh maw, en imuda tehi, Lalpan le muda din i ngaitua sek ah, hinai-sailo ahi. Lalpan a hepi ma mate bang ala hikha thei sek hi.

Nisa la ahung tumta, khua le athim gua hial ta, nungzuiten le thupi khual tak in, Lal Jesu kiangin, “ Hotupa, khua le a vaigei tai zia mipite hi sawl dawkinla, khua neu te ah sawn anek diu va ki chawk leu phana. A nek diu bangma la i nei paw ngal ua, ”a va tiu khale thil kilawm maw ahi kei puai. Mipi zia zat zozai nek ding chu lungkham lo thei gual chu hilo hial ding ahi.

Maleh, Lal Jesu chun maw, aginchak lo gual tak un ahun dawnhu tai..” Nanghawn a nek diu piau in,” ati ta ahi.(Mark.6:37) nungzuite lungkhamna chu asang deu

deu tamai ah. Philip in, "Thagup law in kichaw lele, neucha chiat ah achan ding unle kiting diak puana." a ti hile tithei tak ahi. (John.6:7) mihing lam achun lungkham lothei vang hi puana, maleh entia lei leh van siamtu leh neitu pa tawh umkhawm ala hiz-ing uh ei vei..

Mihing hi ibei dawn a, i lungkham masang sia chuh, Lalpan i chungah thilmak abawl ngailo ahi. Nungzuite bei dawng chun ti ngaina ahetho phat un, Lal Jesu ma ma chun akiang un," VAITHUM BANGZAT LANEI AWM?" ti in adawng kit ta ahi. Nungzuite kiangah thudot hi tuni nang leh kei kiangah le dotna ahi zing hi.

Lalpa chu thil zosia bawlthei himaleh, eimau lam ah sep ding ei phut chu i bawlo chun, bangma bawl ngailo Pathian hi kit ahi. Ei mau ahin thil thupi talua le ei phut ngai pua, ihi thei tawktiang khellam uh bangma eimau ah ngeek anei ngai puai. Lakhut ah um bep chu a dawn ahi. Vaithum bangzat lanei awm.? tiin.

Mi ziazat zozai pungkawm lakah chun, vaithum tangkhat

ziang chale ka nei hi ti ah, hung tuak dok ding khat chale mi a umlo lai un, aminle ki gen langlo, naupang khat in a nei sun sun vaithum panga leh sanga pani chuh nungzuite khut in ahun lan dok ta mai ahi. Zia naupang hi la ngaitua ngai em ?. Nu chingthei tak khat cha hi ngei in tin, insung huangphal tak mun ah hung seilian hi ngei ding ahi. Nungzui ten vaithum nei ahung hawllai ua hin, ama a din ala kisel chak ziang taleh, kua ahem, a utlo sa sa va lakpiak ziang ding?.

I thilnei i sum leh pai hawu hi Lalpan mang nuam ma ma lele, a neitu nangman la phallo chun, Lalpan le mang diak thei ngailo ahi. Zia naupang hin a thilnei a hun piakdaw na zalin, mipi tam takin, malzawlina achan khawlaw uh ahi. Lalpan tuni hin la thilnei tamlo cha kha mangin na lopi tak asem thei ahi ti la ngaitua kha ngai em.?

Zia vaithum panga leh sanga pek ni cha kha musit umtak himaleh, atunna ding dawl tak Lal Jesu kiang atun akhan, alam dang ta khalah maw ?. Jesu'n vanlam a en ah mal azawl

ta, zia chun nungzuite kiangin “ hawm un” ati ahi. Mipite chu Lal Jesu thupiak gualin, sawmnga gualte, zakhat gualte, tiin a gual gual in nungzuite chun a kichut sak tau ahi.

Zia hin Lalpa apat malzawl na dawnna ding achun, thupiak zui a pawimaw zia ei mudaw sak ahi. Thungaina hi malzawl na kipatna ahia, Lalpa thu kipiak thakna hi vangphatna nak ahi bawk hi. Mipi ziazat zozai pi khan nungzuite thugen cha kha azui duam duam mai uh ahi. Zia cha kha ei vei.. malzawl na lamdang a dawn nau khah.!

Lalpa Jesu'n malzawl na dawn ah a pauchap zaw akhan vaithum leh sanga kha ahung pung ziang pua, angai in a um zing nalai ahi. Maleh en tia, mak tak mai chuh, nungzuite khan Lalpa thupiak gual ah mipi lakah zia vaithum leh sanga kha ahun hawp ua leh, hung pung zung zung mai dan ahi.!!

Piakdaw hi malzawl na ahi zia kichian takin muthei in a um ahi. Nungzuite khan ahawp daw tam po ua leh apung khale tam zel mai dan ahi. Lalpa malzawl-

na hi ei man kisim chak ziang di hi loin, mi dangte kiangah hawm zak zel din ei daw i ahi. A malzawl na mube ding chun i khut ah umte chuh i hawmdok zel diu ahi. “Thilpiak in Pathian chu lanzo ngai puanla.” ti ahi khalah maw?.

I khut ua Lalpa'n ei kawlsak thil tamlo cha inei teu haw hi, mi genthei liangvai te kiangah hawm zak ngam din ei daw i ahi. Chanchinpha hi mitin kiangah hawm zak hitiu in, I sum leh pai ithil nei teu hi mi dang te dia hawmzak ngam din Lalpa'n ei daw i ahi.

Ziazia chun aluang doklo pukhri hi loin, aluanglet tuiluang zing gual khristian hi din Lalpa'n ei daw i ahi. Zia ding ah chun Lalpa'n “ Vaithum bangzat lanei awm ?” tiin dotna ei siam ahi. Eima lamkai ah i thilnei Lalpa'n amat nuam bang ahem zat i nei ua, kiphah tak ah hawmzak zel din A man ei daw i ahi.

Kochuam thagau mangthai te dia luanglet ihi nau em? Mi gentheite dia luang let gingtu ihi nau em? tite haw hi ngaitua zui angai ahi. “ Hawm jak tam chu pun zawk diakna ahi'n, a piak

dingsa ziangle pedok nuamlote chun taksapna tuak inau.” ti ahi ngal a. (Thupil. 11:24) Hausak phat leh mi dangte panpi nangka titu chun ahausat phat leh mi a kihiatlo sak nuam sek ui.

Zia takah naupang amin chale kigen langlo hi la ngaitua kha ngai em ?.Thilpiak ngaikhawk mi ahia, ama angsung sangah mi dangte lainatna nei mi ahi dan muthei ahi. Ahung kile kit ding malzawlna kinem ah thilpia le ei pua, maipha hawl ah piale hi keilo ding ahi. Hepina tawh ngaikhawkna liantak nei pum ah pia hingei ding ahi.

Kochuam hing leh hinglo tepte na pawimaw tak chu, banggual in thilpiak a ngaikhawk awm, tihi ahi. Thilpiak hi bang atia mi tamtak in, ngainep maisek ihi diu em?. A tangpi in ei hepitu i hiat mil khak ziak uh ala hisek hi.

Numei naupang simlo ah pating chiat bep le sangnga, ziazat zozai chun zia sanga pani leh vaithum panga bep chu ahun nek ua leh, adawi tawh chiat un ahun neva tau a, maktak in anek bang uh bawm sawm leh ni aluak

dim kit ta mai uh ahi.

Ahileh, zia vaithum a nek bang uh bawm sawm leh ni kha kua achang ta diam?. La ngaitua ngai em?. Tulai ei lawi lak gual hileh mipi nekbang aval kha achang di ki kichuu ngei ina. I Bible ah vang umlo maleh mithiamte sut dan in, zia vaithum kine bang te kha a hun tuakdok tu naupang kha a piau ahi, atiu ahi.

Ngaitua tia, aneisun sun itlo ah hun tuakdok tu naupang kha awchat a um tana e..maw ? apiakdaw kha vaithum panga leh sanga pani bep ahia, achankit kha bawm sawm leh ni hial ahi ta khalah,! a vaikuan ding lai khan nikhat bep dai ding nekding nei ahia, a hung kile lam in, ni tam tak anek khawp ding tawh ahung vaitung ahi tina ahi ai chuh.!

Piakdaw hi haksa sek maleh, piak hi malzawlna ala hi daih ahi, tihi Pathian miten ahia-atchian ma mau chu ahi. Jakob in it tun tun in a chapa Benjamin chu ape dok ah, mukit kinep na neilo hial ding ahia, maleh entia, Benjamin chiana kha achapa Joseph kiang ala hi ei vei...

Benjamin apiak daw ziak in kial ah thiziang dinglai kum tamtak Aigupta hausakna in a ma chapa ma ma Joseph in a vak ahi khah!

Awle, simtu dawitak Lalpa'n ei mau ah thil umte mangin na thupi tak bawldaw agua, zia-ziak chun la khut ah um chu bang ahem ?. zia chu Lalpa angin hun lan in, Lalpa'n ahi pung nuam ahi.

Vaithum bangzat lanei em?. tiin ei dawng zing ahi. "La vaithum chu tui chung ah pai lechin, ni tamtak nung leh mukit ding la hi ngala." (Thugentu 11:1)

--o0o--

Kipakthu Genna

25th February 2020

Pathian mapuina zal in "DAMNA AW" phungvuktu kibelap to zel in, tuchung ahin le **Nk. Dimkhoniang of Zikpi Tampak**, tulai taka Bangaluru ah um in, Supporting Member dinga a hung pang ziakin Editorial Board in achung ah lunggil takin kipak thu i gen uh ahi.

Pathian malzawlna dawngto zel thei dingin bangkim hithei Pathian chun ama pui zing ta hen.

~Editorial Board

Pathian Pawlna Hinkhua Mat.6:5-13

--By Rev. Seilunlal Vaiphei

Bishop pakhat chun, “khawvel gam chuam chuam kataw tam in thil kilawm tak tak le ka mu tam ta khawp mai hi. Zia ka thil mu zosia lak ah kilawm chungchuang pen ka mu chu –‘Gitlo sim ah khupdin’ hi ahi” a tii. Gitlona neilo kua ma l um puau a, l gitlonateu haisan a Pathian l pawl hin Pathian nasemtute’n kilawm a la sa sek uh ahi. Tuni hin zia gual Pathian pawlna hinkhua chu zil ding ihu.

1. Pathian pawlna umzia :

Khristian ten Pathian pawlna l tinau a, ‘pawl’ paukam hi Grik pau a chun, ‘Koinonia’ a tiu a, zia chu Sappau a chun “fellowship” a ti get ui. Tulai a hin kochuam ah khanglaite’n ‘fellowship’ ti paukam hi l mang challang takhawp mai ua, ‘kipawlkhawmna’ tina in l mang ui. Ahin, tuni l zil ding uh Pathian pawlna ti leh PYF ten l mat sek uh “Fellowship” hi chu a kibang kit get puai. Bible ah kipawlna a ti hi chu Pathian leh mihing kikal ah kichamna ziak ah kipumkhatna leh kikawp lemna, kichanau nau dawi umtak hung um hi ahi. Gen 5:21-24 ah khan Enok chu Pathian tawh a kivawp sek ui ti muu a. tichun, kipawlna ti chu kikawmtua zing, umkhawm deu zing ti genna a hi chu!

2. Pathian pawl a lulna:

Pathian pawlna hi gingtu hinkhua hihattu ahi. Pathian in a pawl ngailo gingtu chu a kipuk pai sek hi. Mi’n Pathian a pawl chun Pathian lopinate, Pathian puihuainate leh malzawlnate a thak in adawng sek ui. Pathian pawlna a kipat hin sual ah pukta mihing chu Pathian batna nei in siam thak in a umkit sek hi. Zia guala siamthak ah umta gingtu chun Pathian mizia – hepinate, diknate, felnate, thianthonate a chun Pathian a pawl zinglo ah ahileh a kipuk kit sek in, a dakit mai sek hi. Maleh, Pathian pawl zingsek gingtu ahileh chu thepna a zo a, zotu hina malzawlina leh Pathian pawlna thak kipak um tak chu a chang zui zing sek hi. Ziate ziak a hin gingtu a dingin Pathian pawl zing hi a lul ma ma

ziang a, Khrista ah hinna kingak-na bulpipen in a mang sek a hi.

3. Kuate'n a hem Pathian a pawlsek?:

Mi zosia in Pathian a pawl thei ti chu a dikna tiang chu aum a. Himaleh Pathian pawl thei zosia hin a pawlsek puau hi. Pathian ngaisaklo leh mi lulul, Pathian dawidan sang ah ama dawidan ngai pawimaw zawsekte, kipilsak a, Pathian mamawlo hial ah kingai leh chapote'n Pathian a pawl kei puau. Pathian pawl sekute chun Pathian a dawng zing ziangua, Pathian panglo a chun thepna a do zo pua ti kichechian khawpa ama kipilsak kawm hilot, mi kingaitawm leh Pathian ngainatna chang hete'n Pathian a pawlsek ui. Zia guala Pathian pawl sekte chuh a kiangua mite chun nuam a sau hi. A mau ah Pathian mizia hepinate leh thianthona leh a dang dangte kha amusek ziakun mite'n a ngina sek ui.

4. Pathian pawl ngailo hinkhua:

Gingtu min pu ngal ah Pathian pawl na chang helo mi chu a chapo a, a hinkhua Pathian hepina a kilang puai. Pathi-

an mizia mihingin a chansek di-knate, ginumnate, thianthonate, felnate kha a hinna'n mite'n a mulo ziakun a ngaina tak tak thei puau. Zia bep chu ahipua, Pathian pawl ngailo chu thepna chichuam chuam, sum leh pai mangah thepnate, zu leh khamthei thildang dang mang ah thepnate, numei-pawsal hina سوالنا gitlona lam ah thepnate, thunei leh lalna mang ah thepnate, a do zo tak tak thei puau, a ginnau a chau a, a thagau hinkhuau a chuai in, a kipuk mai sek ui. I gamua piangthak pukkit te hi Pathian pawl peilote a hi deu ui. Haksatna leh gentheina, nasep leh zillai a lawsapna leh natna a thawk unle, Pathian pawlsekte hinna thamuanna thuguk umsek gual hi a neilo ziakun a bei uh a dawng ma ma a, a mau kithatnuam hial ziang le a um sek ui. Ziate kipat a hin gingtu a dingin Pathian pawl zing chu a kul takzet hi ti i hethei ui.

5. Pathian pawl dan lampite:

Pathian pawl dan lampi chuam chuam a um hi. Zia haw lak ah gingtute'n amat nuam deu pen teu chu mitin in imat thei teu

chu chawm chan vak enkhawm hitiu:-

i) **Pauchapna:** Lal Jesu'n a nung-zuite Pathian pawldan a zilsak chu Pauchapna ahi. Pauchap dan le vantang mu ah ngaitak tak ah pauchap sangin eimau ngen ah mun thip ah pauchap a kawmu zaw a hi(Mtt. 6:6). Thil bangkim dawttthei ahinai tia mawk dawt dawt ziang ding a hilo gual in, Pathian kiang ah pauchap ihi zinglai in Ama lunglam hilo imawk dawt dawt ziang thei ahi.

ii) **Bible sim:** Bible ngun tak ah sim ah aum zia hiatthiam gua ngaituana mat hi Pathian pawlna matchak mitin in I mat thei chu ahi. Bible sim ah hiat a pawimaw gual ma in Bible thu mang ah Pathian in I kiangua thu a gen dawng kitve ding ah kihawng tak kawm ah sim ding ahi.

iii) **Kikhawp:** Kikhawp hi Pathian pawlna dang khat chu ahi. Pathian pawlna a hilam helo in khenkhat chu a thugentu zil ah kikhawm leh kikhawmlo ila um sek ua. Zia gual mite hin Pathian pawlna ahi lam a la heph-

alo uh ahi.

iv) **Sacrament:** Baptisma leh Lalpa Za-an kikhawpte hi gingtute'n Pathian I pawlnau matchak ahitho ahi. Sacrament hi Pathian hepina I dawn thakkitnau, pauchap dinga I kilatthaknau a hi ziakin a pawimaw ma ma ahi.

--o0o--

Pathian Biak Kikhawpna pui ding dan leh mawpuakna chanvo neite um ding dan

- Rev. Dr. Hangpi Manlun

1). Thumapui.

Pathian ho ding ah I chiakhawm tak leh I va thil bawlteu kochuam chawmna ahi sek hi. Ziate chu a phathei pen ah bawl I guat ding uh ahi. Lalpa nil eh Pathian ho ding ah a mite a hung khawm ding uh ahi ti hi Khristiante pawmdan ahi. Pathian biak kikhawpna pauchapna, chawihawina, Pathian thu thiangtho sim ah thugenna, sacrament bawl leh hawm, thilpiak piakkhawmna leh malzawlnte I bawl ding uh ahi.

Chun I kikhawm danteu in Pathian ho ding ah hung te lungthim a khawi a , a suthabei thei hi ti hiat a, hawi tak leh kitup tak ah bawl ding ahi. Zia gual chu hileh hung kikhawm ngai lo midang / namdangten I kikhawp dan uh hung muleu le I dan gual tak ua Pathian ho ah ei kawid ding uh ahi. Ziaziakchun I kikhawp hun sung ua thil neucha te tiang ah I bawl dan ua pilvang tak ah I kikhawpnteu puihuai I guat ding

uh ahi. Chun kikhawpna puihuai ding dan leh mawpuakna chanvo neite bawl ding dan te tuhin gen hi tiu.

2). Kikhawpna Hun (Timing) nei leh zui dik guat ding ahi.

Tulai khawvel khanto tawh kituak in biakin tincheng ah kikhawpna hun guat (timing) diktak nei a zui chu pitinna kalbi pawimaw tak khat ahi.

3). Kikhawpna puitu (Meeting Chairman).

Kiguatlawkna phatak nei pum ah midangte tun masang ah a chutna a lua ding ahi. Hun kituptak neisa kikhawpna a puihuai ding ahi. Meeting chairman hi septum ahiziak in thu nepnawi gen tam lo a, kampau kilawm tak takte mang in a puihuai a, a hun tawh kituak la tel a nei sek a, kikhawpna hing tak ah a puihuai ding ahi. Mi thugen sung ah a chutna mun ah lekha sim, zik te a chin lo a, mipite mitmei veng kawm in kikhawmte a etkai ding

ahi.

Atangpi in, kikhawpna nuam leh nuam lo, lawtin leh lawtin lo ding chu puitu khut in le a kinga ma mai. A chawmkim ah gen in Puitu mawpuakna ahi leh kikhawpna hun sung ah chanvo neite kitup tak ah puihuai a hideu pen hi. Zia chu ahi theina ding in zikhthaw ah kimatchakna ding umsate chu hun a pat masang ah khatvei a simsuak masak sek ding ahi. Zia chu phatak ah en pum ah a mawpuakna chuam chuam chanvo neite ko ding chu a mawpuakna ahi.

Zia lo chun nik leh puan le a kilawm hun tawk ah kichei ding ahi. Chuleh nasepna van, sepai puanak, T. shirt ngawng bei po, Jean leh puanak ban kiki lo leh angkillo tawh puitu ah pan lo ding ahi. Chun slipper leh payama tite le puitu hi sung ah chen ah bu lo ding ahi. A ziak chu I biak Pathian chu thiangtho leh za-um ahiziak in milian khat kiang ah chia ding le I van hawpen tawh I kichei ahi chun Pathian hing biakna puitu leh biakin kai ding ten a thiangtho thei pen ah kichei a phai.

Zialochun a chung ah kikhawpna pui ding dan I gen zosia chu puitu chung ah a kinga deu pen hi. I gam ua I hachin puitu ding chu a tangpi in Tual upate leh upate a kithak dial dial sek ui. Unau Mizoram Synod nuai a chun Bialtu Pastorte a kikhawpna ua leh puitu in a pang mai sek ui. Ei uh lak in le thugentu malzin/zingun I nei hun tak ua leh Pastorte puitu in pansak le hin pha in navak um zaw ding ahi.

3.i). Puitu in Pathian ho ding ah chialna (Call to worship).

Kochuamte I kikhawpna ah puitu thil bawl ding masapen chu Pathian ho ding ah mipite chialna ahi. Chun puitu in kikhawpna a pat dan chu a dutui a, a kitup a, thil bangkim bawl pat dante a pawimaw hi. Kochuam mipi chiakhawmte lungthim Pathian lam ngatsak ding in pat dan kitup leh gun a ngai hi. Kitup ti pen chu puitu in a hem, pantu in a hem hawitak ah a hung pat ding tina ahi. Thupil in “A bul pat dik chu a kimkhat zaw sa ahi” a ti gual in puitu in kitup tak ah Bible change a sim a, patna (call to worship) a hun nei ding ahi.

4). Kikhawpna sung a Bible sim ding dante.

Thugen chu Pathian thu Bible mang ah mihingte thugen ahi. Bible sim ahileh Pathian thu mihing kam ah hung gidawk ahi. Chun, kikhawpna hun sung ah Bible sim chu kikhawpna ah thil kibawl (element) pawimaw tak khat ahia, kuan sim leh le, "Pathian thu ngaitha hi tiu" tin, a bu, a bung leh a chang te kichiantak ah a gen masak ding ahi. A sim zaw tak leh "Pathian in a thu a malzawl sa himaleh ei uh ding in a thak in ei malzawl piak ta hen" a ti ding ahi. Chun Bible sim hi kochuamte chawpna ding ah an pawimaw tak khat le ahi. Spurgeon in Bible thu Sam 103 nate a sim chu a ngaithatute ding in a ngainawp um bak a, thagau lam nasatak in a a chawm hi a tiu. Zia gual chun I bawl thei lo ua leh le ei un le I bawl thei tiang tiang ua theitawp ah pan I lak ding uh ahi.

5). Kikhawpna hun a Bible hawitak a sim ahitheina ding in.

(5.i). Diktak ah sim ding ahi.

(5.ii). Za tak leh guntak in sim in.

(5.iii) La simlai in la tahsa umdan

le a dik ding ahi.

(5.iv). Sautak sim ding ahi.

(5.v). La simna ding gendaw dan ah le la dutui ding ahi tite leh a dang dang tel ngaikhawk ding uh ahi.

Chun kikhawp (occasion) dungzui in Thuthung lui leh thuthung thak sim ding ahi tak in le thuthung thak sim nunun a, a zawna mat ding a phai. Chun kit-up tak leh ngainuam um tak ah sim ahi theina ding inn ah hawitak ah sim masak ngei ngei ding ahi. Kiging bek lo ah biakin sung ah hawlkawm leh tuak khak khak sim mai lo ding ahi.

Chun eima thagaulam kichawmna ding ah Bible sim sek ten kochuam chawmna ding Bible a simdawk sek ua, changtel ding hawl na bep ah simdawkten Bible a he tak tak ngai puau.

6). Kikhawp sung a La tel ding dan leh sak ding dante.

Kikhawp hun sung ah Lasak khawmnan ei suthanuam a, lungthim leh taksa asuhal a, a phachuam mama hi. Himaleh, kikhawpna ah i la sakna ziak pen uh chu kisukthatnawpna ding mai mai ahi pua, Pathian biak-

na leh kochuam chawmna ding ahi. Pathian biakna la tel chu du-tui ma ma ding ahi. Chun puitun pantu a ko masang in la tel in mipiten ding pum ah sak chu a pha ma ma hi. Puitu in a la tel chu a number phatak in gen hen la, chang khat sung bang sim leh khangpote ding in le a kigin theina ding un hun lemchang hi ding ahi. A ziak chu la l sak masang chu labu kengloten bang la a hem ti ding a hui a, ziaziaichun la number kichian tak ah mi hiat thei ding ah gen a hem, simdaw a hem zaw tak leh zia la hi “Sa hi tiu” ti ding ahi.

Chun kikhawp sung ah la l sak khawm ding te l tel tak leh l pau mat dan uh le l pilvang ding uh ahi. “ Hun patna ding la sa hi tiu, tite, mipi kingak khawmna ding in la sa hi tiu, tite, thugenpa kona ding leh tawpna la ding hung tel un, ti mai lo in Pathian pakna ding in leh chawihawina ding in sakhawm hi tiu” l ti zawk ding uh ahi.

Ahithei leh tawpna lachu thugentu in a thugen tawh kituak in telsa in kawi thei leh pha ma ma ding ahi. Pulpit a pat “Zia la

kha hun hawl un’ tit e, “la daw nei ten hun tel un’ tite hi chu l tha le a nuam thei puai. Bang ziak hilehle la thugen tawh kism kai lo dan ngaitate kiang ah puang lang kin. Pathian chawihawina ding ah la tel ahi dan he mai ding ahiu.

Chun mi khenkhat in a kai a daw ziak mai uh a hem, a thumal khat dawichuam a nei ziak un Pathian biakna ding ah ting khel lo le a hunt el sek ui. Chun la chu a hun leh mun dungzui ah tel thiam ding ahi. Etsakna ding in Good Friday zingkal kikhawpnan thawkitna la khat kimawk tel taleh a hun tawh kituak lo ding ahi. Chun thaithak nite, Christmas nite, kumthak leh a dang dang te hun tawh kituak ah tel ah sak ding ahi.

aban sutzawp ding...

ISRAEL A PAT SAL NGAKLAK(NUMEI NAUPANG) KHAT (2Lengte 5:1-19)

~ Pro Pastor Pauneithang.

Thupatna:

“Tichun, Aram mite’n a pawl pawl ah mi a la bulu nau mun khat ah chun, Israel ah kipat ngaklak khat sal in ala pui ua, amanu chu Naaman ji na a sep piak a. Amanu chun a pi kiang in, “Ka LALPA hi Samaria ah jawlnei kiang in vachia leh aw! Ama chun a phakna hi ala sudam ding hiven,” atia.” 2Lengte 5:3,4.

Lengte bung 5 na hi Naaman phakna Jawlnei Elisha mang a Pathian in a sukdamna thu ahi. Naaman hi Aram lengpa sepaite hotupa ahia, mi lopitak leh a pu’n a doisak ma ma mi ahi, a ziak chu ama ngawn ah Aram mite a dingin zawna LALPA’n a la pia ta ahi. Naaman hi mi lopitak himaleh phak ahi. Elisha hi zawlnei lopitak, Elija thagau chan aleni chang ahi. Naaman damna dinga Elisha hi a pawimopen in a lang, hile ahi him ahi. Ahinla Naaman damna dinga pawimo te bangjat ahem a um ua, amaute haw chu, Naaman ji, Aram Lengpa, Israel Lengpa, Elisha leh Israel apat Ngaklak (Numei naupang) khat ahiu. Ziate haw laka I gen uh pen uh chu Israel apat Numei naupang hi ahi. Amahi, Aram te’n sala apui mang uh, Naaman ji nasep piak dinga um, suak nu ahi. Pathianin Naaman phakna damna dinga Numei naupang bangma kuaman a koilou, khosung leh vengsung a hetphaklou, a mangcha ahi.

1. A Background:

Israel toh Aram lenggam teni hi, kimelma ahiu. Kido tua zing, kimelma zing ahiu, galguk (cold war) um zing ahi. 2Lengte bung 6 na lama le tigual ma chun, kido

tua, kibulu tua, Israel lengpa le tha thei ding leh mat theina dinga changpang a sawlsek uh ahi. 2Lengte bung 5 na Naaman hunlai a hinle, a pawl pawl a, Aram te’n galguk bawlin Israel gam

a va bulu sek uh ahi. Zia a va bulu nau a chun, Israel mi Numei naupang hi le Sal a ahung mat uh ahi.

2. Israel Numei naupang dinmun leh Pathian hepina (God's grace):

Israel Numei naupang hi, Naaman in a ji nasep piak dinga akilak ahi. Naaman leh a ji suak a um ahi. Suak leh sal dinmun ahi a um na. A gamlam uh leh a Innlam ua, a nu le pa kianga pat Aram te'n a bulu nau a chun, a Inn leh lou uh le halpiak maithei ahiu, a nu le pa le bang a lo uh hetlou ahi, that le that maithei ahiu. A suapite, a Innveng, a gual leh pai te a ngai laitak le hiding ahi. Zia haw zosia chu a ma ading a hitheilo ahi, lak mang a um ahiziak in, ahiloleh lakpiak a um ahiziak in. Lungngaia akap kap in hinkhua le a mang zing ding ahi. A dinmun hi phataka en leu hin, Numei naupang cha ahilai-tak a piting tamtak in le a atuak zolou a tuak Lungthim na (broken heart) ahi, a chan hi setak ahi.

Zia Numei naupang hi chan setak chang maleh, suapite Pathian in a hemil puai. Pathian

in a chate thagau lama a sepai hattak leh hiamtaka a mat ut te chu, training haksa tak a pe sek ahi. Zia Numei naupang hi Pathianin thagau lama training sangtak a piak ahi. Pathian in a mite training jat chuam chuam a pia hai, Abraham in kum 100 lam a ngak ahi chapa Isak a neina dingin, Job in a chate zosia a chan a, anei a go zosia lakpiak ahin, a pum a meima tuam ahi, Pathian training na hi mihing gel phaklou leh hiatthiam phaklou ahisek hi. Ahinla, training a chai phat tak uh le thagau lama piting tak , thagau lama chapouna haw chu a bei seka, Jesu guala lungput ami te'n a neisek uh ahi. Pathian in lopina a chang sek ahi. Zia Numei naupang hile, training sangtak Pathianin a piak ahiziak in, kamkhat a gen, "Ka LALPA hi Samaria ah jawlnei kiang in va chia leh aw! Ama chun a phakna hi a la sudam ding hiven" zia a thugenna thu chang a pat hin Naaman phakna apat damna a chang na ziak tak a hung hita ahi. Halleluia!

3. Israel apat sal Numei naupang hi Pathian in a

matchak ahi:

Zia Numei naupang khel lou a le, Pathianin Naaman damna a pethei ahi. Israel lengpa aum a, Aram lengpa ahin, a gam sungua miching, mithiam tamtak aum ding ahi. Numei naupang panglou inle Elisha kiang a tung theia , Naaman in damna a mu thei ahi. Ahinla, bang atia Naaman damna dinga, a patna zia Numei naupang khel hi Pathian in amatchak a dia aw? Kati sek hi. Mi lopi, miching leh mithaim te, lengte haw natiang le aki suang theilo na ding ua, Ama Chungnungpen Pathian bep lopi-na a chang theina dinga, bangma lo mai mai te bang Pathianin a mang sek ahi. Kua hileh chun le Pathianin nang le amin lopina dinga a hung mang thei zing ahi, matchak le a nuam ahi Pathianin. Sal Numei naupang hin Pathian in a matchak ahilam le helo mai-thei ahi, Pathian a Pathian zia alat na tak le ahi. Bible a amin le a chuang pua, “Israel apat ngaklak khat” akiti mai ahi. Israel te’n numei te Jesu hunlai tian-ga khan le a koi niam ma mau a, numei naupang hi musit um

ma ma chu hina maw? Zia Numei naupang hinkhua apat khat leh ni thagaulama I phatchuampi thei khak ule vak en hitiu.

3.1 Numei naupang hin ama toh a melma te kal a Thagau Thiangtho panmun a pia ahi.

Numei naupang hin Naaman insunga um maleh, a melma ahi tizing henla hileh, a damna ding le gel pawimo pua’n a. Chuleh ngaidam theilouna a nei zing chun, Naaman inle damna a mutheilou ding ahi. Himaleh, Numei naupang hin Pathian cha hina, Israel mi tak ahina a sulang ahi. A ziakchu, ama’n a melma te toh akal a Thagau Thiangtho panmun a pia. A melma teu bawlsiatna te, bawlsiatna ma in a thuk puai. Thilphalo chu thilphalo ma in a thuk puai. Lal Jesu khawvel a mihinga hung piang nailou maleh, a lunglam leh a doidan chu khawvel kisiam ma apat um Khrista ahiziakin; zia Numei naupang hin Thagau Thiangtho mun a piak ziakin, Khrista lunglam chu a hinkhua a pawdok thei ta ahi. Tichun, a pu leh pi a dinga a phatna ding uh a gel pawimo in, ngaidamna a nei ahi.

3.2 Thagau Thiangtho in panmun a chang tak ziakin, Numei naupang thugen in Pathian apat lampi kawkmun na thamuan um tak chu ahita ahi.

Numei naupang kam a thu pawt chun, a pu a dinga damna a mutheina lampi Pathian apat kawkmun tu ahita ahi. A hinkhua Thagau Thiangtho in a lua tak ziakin, a thugen, “Ka LALPA hi Samaria ah jawlnei kiang in vachai leh aw! Ama chun a phakna hi ala sudam ding hiv-en.” A pu sepaite hotupa leh a ji’n a zawp uh a ngai ta ahi. Sal Numei naupang himaleh, Lalpa Thagau in a matchak ziaka chun, a lungthim uh a sukha ta ahi. Tichun, Numei naupang thugen ziakachun, sepaite hotupa leh a ji chun, Aram lengpa a va mu uh a ngai ta ahi. Numei naupang thugen ziakachun, Aram Lengpa’n le a melma Israel lengpa kingaitawm a lekhatot a thot a ngai ta ahi. Leng khat in a melma leng dang khat kianga panpina a dawt mai ding chu, thil hitheilou khat ahi. Himaleh, a sepai hotu, galzona mun tamtak a zopiak tu, a doisak mama ahiziakin, a

damna ding chu ama chapona koimangin, a doisak zo ta ahi. Numei naupang thugen ziakachun, Israel lengpa’n a leng puanak a bawthek ta ahi. Leng in a puanak bawthek jiang tichu, a case lian ma ma ahi, a pet pet a gal kidona umthei tina ahi. Elisha’n lengpa’n a puanak a bawthek hi ti a het phatin, “kei kiang ah hung sawl in, Israel ah jawlnei khat a um hi ti a het na dingin” ati ta ahi. Tichun, Elisha’n Jordan lui a sagivei kidia dinga, a sawl gual a va bawl zo in, Naaman chu a phakna apat in a dam thi-ang ta ahi. I bible in, “pawsal naupang taksa gual” a hung hikit tai ati ahi. Halleluia! Numei naupang thugen chu Lengte, Sepai hotute, milian milal te leh Zawlnei te’n le a thu a zawp uh a ngai ta ahi. A ziakchu, Pathian in Numei naupang a matchak ziak ahi.

Thutawpna:

Suapi dawitak, zia Numei naupang guala hin dinmun sia laki gel kha em? Kei vang ka chan a se na lawm lawm e ti l um uh em? Nang le Pathian in a

hung hemil puai, Pathianin I zaw
lou ding ei tuak sak lou ahi. Nu-
mei naupang hi a nu leh pa ki-
anga akilekit hi ti chu I bible a
aumlou ahi. Maleh I hetthei chu,
a pu Naaman leh a ji hi a insung-
mi Pathian in a piak ahita mai
ahi. Pathian lunglam (purpose)
amatchak na mun, a koina kha
Numei naupang a dinga a paw-
imo pen ahi mai ahi. A chan se
tak a gelin um himaleh, bible a
achanchin chuang hial a Pathi-
an lunglai sukha, a minthan na a
Pathian in a heidawk kit ahi. Sua-
pi, nangle Numei naupang gual
a chan setak in la kingai maithei
hi. La dinmun setak a la um inle,
Pathian in la dinmun phazaw in
hung siampiak ta hen. Numei
naupang gual a dinmun theng lou
a Pathian in a hun koi inle, Pathian
in naupangnu guala a matchak
nawpna a um ahi ti hemil kin. La
hinkhua a Pathian lopina chang
ding ahi. Chuleh, nang leh kei
inle, Numei naupang guala, thil
phalo a ei bawlte haw, a pha-
lo ma thuk lou dingin Pathian in
ei dawi ahi. Ngaidamna Khrista
Jesu a nei a, I hinkhua a Thagau
Thiangtho panmun pe chiat din-

gin kisai tiu. Tichun, Jesu Khrista,
Pathian hing Chapa chawihawia
um intin, Pathian lopina chang
ding ahi. Amen.

--o0o--

Presbytery Sung thu

I. Pastor Transfer & Posting:

Tukum 2020 hi Pastorte general transfer ahi kum tawh ki-tawn in Khuga Sadar Presbytery 62nd Annual Session, Tangmual thupukna dungzui in KSP sung ah I pastorte a umnau mun ding chiat un a nuai ah gual hin January leh February 2020 sung in a kichawn tau.

i. Rev. Siana Phaltual, Executive Secretary KSP in Date 7th January nin Executive Secretary Quarters nusia in Date 8th January in Executive Secretary thak Rev. S.T.Kaia Vaiphei kiang in KSP Office bearerte hiatpinan mawpuakna a lan a, Date 27th February nin Shillong kochuam enkawl ding in Shillong a zuan tai.

ii. Rev. S.T.Kaia Vaiphei in Town District Bialtu Pastor ahina chu Bial enkawltu ding ah guat Rev. Haulalven kiang in Date 22nd January in mawpuakna a pedawk ta, chun Date 23rd January nin Nghathal nusia in Executive Secretary Quarters, Tui-buang ah a kichawnlut tai.

iii. Rev. Haulalven in Tuithanak Bialtu Pastor Quarters, Tangmual nusia in Town District Bialtu Quarters, Nghathal ah Date 30th January nin a kichawnlut tai.

iv. Rev. Seilunlal in Date 30th January nin Khuga Bialtu Pastor Quarter, Kangvai nusia in a bial thak ding Tuithanak District Pastor Quarters, Tangmual ah a kichawnlut tai.

v. Rev. Thanglianmang in Sadar District Bialtu Pastor Quarters, Leilon chu nusia in Date 3rd February nin a bial thak ding Khuga District Pastor Quarters, Kangvai ah a kichawnlut tai.

vi. Rev. B. Lala, Vaiphei Christian Fellowship, (VCF) Delhi ah sem chu term thak khat (kum thum) um nalai ding ah KSP. 62nd Annual Session in a guat ziak in Khawmpi zaw in Delhi zuan in a chia kit tai.

vii. Rev. Lienthienmang, Shillong Bialtu Pastor chu Sadar District Bialtu Pastor ding ah guat a hia, a umna ding Sadar District Pastor Quarters, Leilon ah 43rd

Synod Seesion zaw, Date 10th February in a kichawnlut tai.

viii. Rev. D. Robert Thanga chu M.Th zil ding ah a kidawtna chu phal piak ahi dungzui in a pawtdaw masang ah a sepna ngai ma Field Secretary na sem a, Tispari ah um kit ding ah guat ahi.

ix. Pro. Pastor Pau-neithang chu a hina ngai ma, CKKP co-ordinator ding ah guat kit ahia, chun a umna ngai ma, Town District ah Rev. Haulalven kaihuaina nuai ah um ding ah guat ahi.

II. Mission & Evangelism:

- i. Presbyterian Mission School, Tispari ah mat ding Computer Desktop leh Printer hawitak chawkdaw ahi tai.
- ii. Presbyterian Mission School, Tispari Building Extension pat ahi ta, Date 18th February nin Saipum kochuam Social work ah kuan in foundation zaw ahi ta, tuhin a sung ah lei a kusun laitak ahia, a lei a hung det tak leh sak pat hi ding ahi tai.
- iii. Mission Field, Tispari ah Electric temporary ah hun sawttak

a la kila chu tuhin thik post panga (5) phu in permanent ah laklut ahi tai.

- iv. PMS, Tispari chu Dt. 4th February in a kai pan tau a, textbooks leh uniform te ngai-tua piak ahiu.
- v. Date 6-8 February sung in 17th Mission & Evangelism Khawmpi, Leimakhong Mission Veng ah “Tawden ah umte hukdaw” Isai 1:6 thupi ah mang in Speaker ah Evan. Thangneo mat ahia, lawting tak ah zaw ahi tai.
- vi. Date 8th February nin Sekmai ah Biakin thak sakna ding in suangphumna Rev. Haulalven, Moderator in a nei hi.

III. Thu chuam chuam:

- i. Kum 2020 budget ah kikawi Pastor Quarters maintenance ding a nuai ah te sia hi piakdaw ahi tai. Ziate chu: i. Town District, ii. Khuga District, iii. Tuithanak District, iv. Shillong.
- ii. Kum 2020 District wise Church grant Khuga District ah piakdaw ahi tai.
- iii. Income Generating Project, (IGP) building Tuibuang ah La-

- trine sakna nasep pat a hi ta,
March thasung zaw hi ding ahi
tai.
- iv. Town District Pastor Quarters
ding sakna foundation pat ahi
tai.
- v. Trustee Committee malakna
chiatha zel in KSP munpi chaw-
kna ah Plot kihawmte mark
kibawl a vel vel ah bawlkut
ngaitalo ding in cement con-
crete post plot tin ah siam fel
ahi tai.
- pan thei zing ahi.
- ii. Kuale zia “Damna Aw” ah thu-
sua ding Pathian thu chuam
chuam kochuamte thagaulam
ah khantona ding leh sermon
sua nuamte ding in Article
Chief Editor, Editor leh joint
Editor khat pen pen kiang ah
piaklut zing thei ahi.
- iii. Kuale zia “Damna Aw” thasin
Pathian thusuak hi phungvuk
nuamte ding in a nuai ah gual
hin pan zing thei ahi:

i. Patron member

..... ₹. 3,000/- (kum 3 a ding)

ii. Supporting member

..... ₹. 2,500/- (kum 2 a ding)

iii. Memorial gift

..... ₹. 2,000/- (kum 2 a ding)

iv. Encouraging member

..... ₹. 1,000/- (kum 1 a ding).

IV. Dawtna leh Chialna:

- i. 2nd M & E Committee thupuk-
na dungzui in Cachar Mission
Field Evangelist Quarters
a ding furnitures pawimaw
khenkhat long arm bench – 2,
Dining Table – 1 leh Table –
1, tuak ding ah kochuam leh
mimal tawmngai kihawl chu
tuhin Tangmual kochuam in
Table khat a hun siam tau a,
chuleh T. Loklaiphai kochuam
in thawlawm a hun dawl ua,
a sum in ₹. 1,350/- a hun pe-
lut ua, kipak a um takzet hi.
Kochuam leh mimal kuale mis-
sionary nasepna pang nuam l
um uh chun a thil leh a sum ah

--o0o--

The 17th MISSION & EVANGELISM Conference - 2020 Khuga Sadar Presbytery



~Amun :- L. Mission Veng P.C (KSP)

~Ahun :- 6th - 8th March 2020

~Thupi :- “Tawden ah umte hukdaw” ~Isai 1:17

~Speaker :- Evan Thangneo

Pathian mapuina zal in 17th M&E Khawmpi - 2020 mangthei ding ah ei puitu Pathian chu lopina chang taken. Kochuamte a tam thei pen ah chiakhawm ding in ka hun chial ahi.

Zia khawmpi hi buaina umlo ah thagau lam ah lawting tak ah matzaw ahi theina dingin kochuamten pauchapna'n del zui chiat hitiu.

Sd/-
Rev. (D.Robert Thanga)
Field Secretary

Sd/-
Rev. (H.L.Vena)
Moderator

‘DAMNA AW’ PHUNGVUKTUTE :

PATRON MEMBERS :

- | | |
|-----------------------|-------------------------------|
| 1. Pu P. Vaiphei IAS, | Imphal |
| 2. Upa Henthianthang, | S.Kotlian |
| 3. T.Upa Haulallawm | S.Kotlian |
| 4. Upa Thienkhomang | S. Kotlian |
| 5. Upa Laltinkhup, | HQ. Church, Tuibuang |
| 6. Pi Manliankim, | HQ. Church, Tuibuang |
| 7. Nk. Lalsangpui, | S.Kotlian |
| 8. Upa D. Mina, | Lingsiphai |
| 9. T.Upa Ph. Gena, | Lingsiphai |
| 10. Pu. Khamlal | Saipum |
| 11. Pu Khamliankap | Saipum |
| 12. Pu. Tinlunlal | Saipum |
| 13. Pu. S.Kapbawi | New Delhi |
| 14. Upa Genhau | Central Church, Compound veng |
| 15. Pu. Khailianbawi | Central Church, Compound veng |
| 16. Pi Kimtawi | Kohima |
| 17. Tv. Daniel | Tangmual |

MEMORIAL GIFT :

- | | |
|--------------------------------|--|
| 1. Pi Deem Melody, | Central Church, (Rengkai)
<i>[In loving memory of (L) Upa Lamthianlal]</i> |
| 2. Pi Rebekah | Kangvai
<i>[In loving memory of (L) Pastor Khaivung]</i> |
| 3. Upa Liansomthang | Lingsiphai
<i>[In loving memory of (L) Pu. Henzagen]</i> |
| 4. Pi. Nem Grace Boisi Capvung | Delhi
<i>[In loving memory of (L) Pi Vanlalchhuangi]</i> |

SUPPORTING MEMBERS :

- | | |
|---------------------------|-----------------|
| 1. Upa Khomlunlal | S.Kotlian, |
| 2. Pu. S.Thangminlian | Lingsiphai, |
| 3. Pu Lelboi, | Lingsiphai |
| 4. T.Upa Lalneilian | Central Church, |
| 5. Pu EL Soson | Central Church |
| 6. T.Upa Genminthang, | Central Church, |
| 7. Pi. Kimneihawi | Saipum |
| 8. T.Upa J. Mark | Saipum |
| 9. Pu Genthiankap, | Nghathal |
| 10. Pu Lianzakhup | Nghathal. |
| 11. Pu Lemthang | L. Mission Veng |
| 12. Rev. S.T.Kaia Vaiphei | Nghathal |
| 13. Nk. Dimkhoniang | Zikpi Tampak |

ENCOURAGING MEMBERS :

- | | |
|-------------------|-----------------|
| 1. Pu K. Minlian | Tangmual, |
| 2. Upa Ph. Kamlam | L. Champhai, |
| 3. Upa S.T.Siama, | L. Mission Veng |

Damna Aw monthly magazine hi tutiang ahin kochuamte'n phungvukna i bawlte'u ziaka hin chiazal i hiu a, kuale phungvukna bawl utte a ding in bangtik lai in le bawlthei zing ahi.

(i). Patron member- Kum 3 (three) a ding in. ₹. 3,000/-

(ii). Memorial Gift- Kum 2(two) a ding in. ₹. 2,500/-

(iii). Supporting member- Kum2(two) a ding in ₹. 2,000/-

(iv). Encourager- Kum 1(one) a ding in. ₹. 1,000/-

Chun, sum thawt nuamte a ding in:

A/C name: Khuga Sadar Presbytery(MPCS)

A/C nos: 32483318505

Branch code: 6182, CCpur

CIF nos: 86412486695

IFSC nos: SBINOOO6182.

HIATSAKNA

Damna Aw ngainatna ziaka Encouraging Member ah pangtute zosia chung in kipak thu ka hun gen hi. Editorial Board dawidan dungjui in Encouraging Member hina hih kumkhat bep dinga bithiak ahi tak ziakin tuchung Issue ah kipat hin hung kisulang thei talo ahi. Memberte hi-atthiamna le i kidawn ngal ui.

~Editor.